

Jossy Figaroa director di APA

“Tin poco movecion pa cuminsa haci tereno limpi den Zona Liber na Playa”

ORANJESTAD – Ya caba Jossy Figaroa tin 6 luna como director di Aruba Ports Authority y te ainda e no a mira poco movecion pa cuminsa haci e tereno limpi, pa despues benta e edificionan abao.

Den bista di turistanan, segun comentarionan, for di e punto aki te cu Bushiri, ta un mahos bista y ta mescos cu ta un escenario saca for di un pelicula di terror cu ta haci cu hende tin mal impresion di dje. Figaroa ta sigui splica cu tin un parti di Zona Liber caba cu ta di APA, cu ta e parti banda di panort, cu ta 5 of 6 di e edificionan. Dentro di un luna, lo bay cuminsa benta 4 di nan abao.

Posibel mercado di purga? Tin un banda pariba cu tin diferente aparato den dje. Esaki ta wordo haci limpi y loke tin aden y cu no ta bay

uza mas lo bay bende riba findishi, caminda cu ta duna pueblo oportunidad pa bay cumpra nan. Lo tin cu bay papia cu Zona Liber con lo bay regla esaki, como cu tin regla cu APA tin cu tene cuenta cu esey. Ta dificil pa bay saca tur cos dilanti y bende riba caya. Pero esey ta e caso, esaki lo sosode. Lo prefera si pa regla pa laga nan den loods banda pariba y hende bin wak y cumpra e articulonan cu APA no tin mester di nan mas.

Combersacionnan lo intensifica

Di otro banda te ainda algun edificio ta di Freezone N.V. A cuminsa combersa cu Freezone y Gobierno y pronto lo bay intensifica e combersacionnan pasobra intencion ta cu e parti lo bay bira liber y cu gobierno lo bay basha abou. Zona Liber tin un tereno na Barcadera. Nan no por a desaroya esaki pasobra no tabata

tin un caminda. Awor cu tin un caminda, pronto lo bay tin mas desaroyo eynan.

Tambe ta intencion di gobierno pa bay traha un edificio nobo di duana eybanda, caminda cu tin un caminda nobo entre Barcadera y e caminda principal. Esey lo bay trece un desaroyo completamente nobo. Sa cu ta un inversion basta grandi cu zona Liber tin cu haci, pero eynan, na Playa, e edificionan no lo bay keda mas pa sirbi como zona liber.

Edificionan lo wordo basha abao

Segun Figaroa, e punto di APA ta cu nan no ta kere cu e edificionan lo no bay keda pa largo como parti di zona liber. Maneho di gobierno ta cu zona liber no lo keda mas na Playa y cuminsa haci limpi. Plan ta pa benta e edificionan abao. Figaroa a comenta cu tin hopi interes pa e tereno. APA

kier pa e carga move pa asina tin mas movecion eynan. Loke si mester ta pa bay ta mas cauteloso mirando cu ta bay haci un inversion pa haya e edificionan eynan y saca tur e inversion cu nan a haci y pa mantene un cierto cantidad di placa cu nan ta bay haya di e tereno ey.

Interes pa tereno

Tin hopi interes, pero hopi di e interesnan ta pa haya e tereno ey mas barata. Loke APA ta bay haci ta pa bay ta den contacto cu DIP y cu e minister di infraestructura, pasobra e tin cu indica e destinacion di e tereno aki, si ta pa zona liber of actividadnan di e waf. Si ta bay traha algo cu no tin di haber cu waf, e ora ey mester haci cambio di e destino di e tereno.

APA ta den combersacion cu e minister y lo bay sigui papia cu nan. No tin nada cla y concreto, pero tin hopi interes pa e tereno, Figaroa a termina. □